

**PARTORDING NI PARMINGGUON
PASKAH PARJOLO
(PARNINGOTAN HAHEHEON NI
TUHAN JESUS)
HKBP DISTRIK XXVIII DKI JAKARTA
MINGGU, 31 MARET 2013**

(Fragmen ni angka sisean na di bagasan habot ni roha jala tahuton)
(dijahahon sahalak na gabe sisean)

*Aha ma lapatan ni panindangion dohot halongangan
na binahenNa nasalilaon,
Ai tong do ingkon tuhukonNa silang i.
Marujung do Ibana di hagaleon,
Manaon jea jala dipasiding.
Nuaeng, hita naung pinillitNa
asa rap udur mangula di porlakNa i,
ndada holan na marsak be rohanta,
alai nunga digolii biar ni roha.
Na ingkon do tuhukonnam i silang ni portibi on?
Boasa ma ingkon pillitonNa ham,
molo na ingkon tadinghononNa do ham i di bagasan biar ni roha?*

*(Fragmen ni sahalak parompuan na mandapothon tanoman ni
Jesus)*

*Ndang binsar dope mataniari,
alai nunga borhat nasida
laho mandapothon tanomanNa i.
Mantat na hushus na pinaturenasida i ma
na pahothon roha nasida manghaholongi Jesus di bagasan hibul ni roha.*

*Nunga digulang be batu i sian tanoman i.
Alai, didia do Jesus i?
Ndang jumpang nasida be bangke ni Jesus i.*

*(sahalak suruasuruan manghatai tu sahalak parompuan)
Kristus Tuhan, nunga hehe Kristus!
Kristus Tuhan, nunga hehe Kristus!*

1. PROSESI MASUK

- Ro ma dakdanak singkola minggu manang remaja mamboan lilin tu jolo, huhut mangendehon “Nunga Hehe Kristus I”. Sahalak ma na mamboan lilin na balga (lilin Kristus), diboan angka donganna ma lilin na asing na i. Diaturhon ma parpeak ni lilin i di meja altar, jala diliati lilin na asing i ma lilin Kristus i.

Urutan ni barisan: dakdanak na mamboan lilin – paragenda – pandita – angka sintua.

**P (pagalakhon lilin → dung digalahi lilin i,
dipadompakhon ma tu angka ruas ni huria, huhutdidok
ma:)**

*Sondang ni Kristus na marsinondanng di bagasan las ni roha
Palaohon haholomon sian ngolunta
Nunga salpu borngin i, ro ma ari naimbaru
Sondang ni hasintongan i do na manondangi hita*

2. JOUJOU TU PARSAORAN DOHOT DEBATA

P : Kristus Tuhan, nunga hehe Kristus.

U : *Pinuji ma Kristus Tuhan, Raja na songkal jala na badi!*

P : Ale bangso ni Debata, marsurak jala marolopolop ma hamu. Jongjong ma hamu di jolo ni Debata huhut mangendehon pujipujian di goarNa.

3. ENDE: “PESTA PASKA HATUAON” BE.93:1-3 (BL.91)

Pesta Paska hatuaon! Pesta Paska haluaon sian hamatean i, sian hamatean/ Tuhan Jesus do pasuang, hangoluan, hasonangan tu saluhut jolma i

*Talu ho banua toru ndang tarbahan tiopanmu Raja Siparngolu i,
Raja Siparngolu i/ Hamatean, hamagoan na so pola habiaran;
nunga talu i sude*

*Tuhan Jesus do na monang, Tuhan Jesus do pasuang las ni roha dame
pe, las ni roha dame pe/ Dongan golom ma hataNa, na porsea di Ibana
ndang tagamon mago be*

- 4. VOTUM - INTROITUS (JONGJONG)**
- P : Marhitehite Goar ni Debata Ama dohot Goar ni AnakNa,
Tuhan Jesus Kristus dohot Goar ni Tondi Parbadia, na
tumompa langit dohot tano on.
- U : Amen.
- P : Unang ho mabiar, Ahu do Bonana dohot Ujungna. Na
mangolu do, jala naung mate do Ahu najolo, jala ida ma,
Ahu do na mangolu ro di saleleng ni lelengna, jala di Ahu
do anakhinsu ni banua toru dohot hamatean. Haleluya.
- U : (Menyanyikan) *Haleluya... Haleluya... Haleluya...*
- P : Martangiang ma hita: Ale Tuhan, Anak ni Debata, naung
mate tarsilang jala na hehe di ari patoluhon, pujipujian
dohot hamuliateon husombahon rohanami tu Ho. Dilehon
Ho do diriM tarsilang holan alani holongMu tu portibi on.
Nunga talu be hamatean dohot dosa marhite hamamateMi.
HamamateMi ma na gabe hamamate ni dosa dohot
hadirionnami na leleng i; jala haheheonMi, na hupertahon
hami sadari on, i ma na gabe haheheon ni ngolu nang
parngoluannami raphon Ho. Dibahen i, ndang mabiar be
hami tu hamatean manang tu haholomon, ala Ho do
Hangoluan dohot Sondang di hami. Hupuji hami ma Ho di
bagasan hamuliaon ni haheheonMu naung paluahon hami
nang sandok portibi on; jala ajari ma hami asa tog
haporseaonnami jala marpanghirimon na manongtong tu
Ho. A m i n .

(HUNDUL)

- 5. ENDE: “NUNGA TALU HAMATEAN” BE. 96:1+3 (BL.101)**

*Nunga talu hamatean Dibaen Tuhan Jesus i/ Ai na hehe do Ibana
Songon na nidokNa i/ Haleluya, haleluya Nunga hehe Jesus i/
Haleluya, haleluya Nunga hehe Jesus i*

*Marlasroha be ma hita Ala hehe Jesus i/ Ai malua sude hita Sian
hamagoan i/ Haleluya, haleluya Nunga hehe Jesus i/ Haleluya,
haleluya Nunga hehe Jesus i*

6. "MIAN DOPE HATAMI DI ROHANGKU?"

Mian dope HataMi di rohangku,
asa satia tongtong jala ndang marangkup Ho di ngolunami?
Mian dope HataMi di rohangku,
asa tongtong burju mangalehon tingkingku laho pasangaphon
Ho?
Mian dope HataMi di rohangku,
laho pasangaphon angka natorashu asa martua
jala leleng ngolungku?
Mian dope HataMi di rohangku,
laho manghangoluhon holong,
asa unang husegai hadameon ni donganhу,
manang hutangko las ni rohana
manang mangalangkupi angka ugasanna?
Mian dope HataMi di rohangku,
asa burju manghamauliatehon saluhut,
asa huhasabamhon angka naung hujalo sian Ho?
Mian dope di rohangku saluhutna angka HataMi, Tuhan?

7. ENDE: "MANSAI LAMBOK TUHAN JESUS" BE.677:3-4

*Ngolu ni jolma hatop do lao salpu/ Salpu do ho dohot au/ Ai hamatean
musu na jumorbut/ Mangonggop ho dohot au/ Reff.*

*Antong sai ro ma ho/ angka na sorat sai ro ma ho/ mansai lambok
Tuhan Jesus manjou/ pardosa mulak ma ho*

*Dijanghon Jesus do angka parjahat/ mulak ma ho dohot au/ Dosam
sudena ias sesaonNu/ muba ma ho dohot au/ Reff.*

8. MANOPOTI DOSA – BAGABAGA HASESAAN NI DOSA (JONGJONG)

P : Ale Debatanghu, ndang adong na buni di toru ni
SondangMu. Ida ma hamि jolma pardosa on.

--saat teduh (*diiringi BE. 683:1*)--

P : Uju gok hajungkaton rohanami jala hupangke hamि pahean
pangarupaon;

U : (*Mangendehon BE No.171:2*) *Asi ma rohaM taringot tu
pangalahongku/ Olo tutu, jotjot do na lilu dalanhу/ Sesa
dosangku sude Debata*

P : Uju gok hosom, teal, elat, rimas dohot late rohanami; uju na
ginjang rohanami marnida saluhut;

U : (*Mangendehon BE No.171:2*) *Asi ma rohaM taringot tu
pangalahongku/ Olo tutu, jotjot do na lilu dalanhу/ Sesa
dosangku sude Debata*

P : Uju na huula hamि angka hajahaton jala las rohanami
marnida pardangolan ni dongannami; uju na marlojungi
patnami tu hageduhon dohot na so uhuh;

U : (*Mangendehon BE No.171:2*) *Asi ma rohaM taringot tu
pangalahongku/ Olo tutu, jotjot do na lilu dalanhу/ Sesa
dosangku sude Debata*

P : Uju gok dohot pamulasion, sipaotooto dohot hadoboon
pamangannami, jala hupadao hamि pinggolnami sian
HataM, alai hupaeleng hamि tu angka haotoon dohot
hageduhon;

U : (*Mangendehon BE No.171:2*) *Asi ma rohaM taringot tu
pangalahongku/ Olo tutu, jotjot do na lilu dalanhу/ Sesa
dosangku sude Debata*

P : Ale Debata, di Ho do hasesaan ni dosa; ditobus Ho do hamि
jala dipatuduhon Ho do asi ni rohaM di hamि. Ai songon on
do holong ni roha ni Debata di portibi on, pola do AnakNa
na sasada i dilehon, asa unang mago ganup na porsea di
Ibana, asa hangoluan na salelengle lengna di Ibana.
Hasangapon ma di Debata na di ginjang.

U : Amen.

(HUNDUL)

9. ENDE: “DI GOLGOTA” BE.619:1-2

Di Golgota husolsoli do sude dosangku na jorbut i/ Ias au dibaen mudarNa i, puji Jesus i/ Puji ma GoarNa, puji ma GoarNa/ mudarNa paias rohangki puji Jesus i

Malua au sian dosangki, nunga tung sonang martua au/ di tano on dongananNa au, puji Jesus i/ Puji goarNa, puji ma GoarNa/ mudarNa paias rohangki puji Jesus i

10. EPISTEL: ULAON NI APOSTEL 3:11-16

P : Alai dung sai udur ibana dohot si Petrus dohot si Johannes, marrongoman ma saluhut halak tu nasida, tu inganan na margoar emper ni si Salomo, dibahen songgot ni rohanasida.

U : Alai marnida i si Petrus, ninna ma mandok natorop i: Hamu, halak Israel, boasa longang rohamu mida on, boasa hami diberengi hamu, songon na hira gogonami sandiri manang hadaulatonnami mambahen mardalan halak on?

P : Na dipasangap Debata ni si Abraham, si Isak dohot si Jakkob, Debata ni angka amanta i do Jesus naposona i, na pinasahat jala na sinoadahonmuna di jolo ni si Latus na mandok uhumna, paluaon Ibana nian.

U : Alai disoadahon hamu do na badia jala partigor i; dipangido hamu do, lehonon tu hamu pamunu i.

P : Alai dipusa hamu do partogi tu hangoluan. I ma dipahehe Debata sian na mate; hami do angka sitindangi ni i!

U : Asa ala ni haporseaon di Goarna do dipargogoi Goarna halak on na niida jala na tinandamuna, gabe dilehon haporseaon na sian Tuhan i do hahisaron tu ibana di jolomuna saluhutra.

P : Songon i ma Hata ni Debata. Martua do angka na tumangihon Hata ni Debata jala na umpeopsa. Amen.

11. ENDE: “NUNGA HEHE KRISTUS I” BE. 633:1+4

Nunga hehe Kristus i, Haleluya/ sian hamatean i, Haleluya/ parlangitan jouhon ma, Haleluya/ tano on alusi ma, Haleluya

Monang do Tuhanta i, Haleluya/ Talu hamatean i, Haleluya/ Mago do sorop na i, Haleluya/ Ala monang Tuhan I, Haleluya

12. MANGHATINDANGHON HAPORSEAON (JONGJONG)

P : Rap dohot angka donganta sahaporseaon di sandok portibi on, taingot ma haluaon naung pinatupa ni Tuhan Jesus Kristus i marhite hata haporseaonta, rap mandok ma hita.

U : *Ahu porsea d.u.*

(HUNDUL)

13. KOOR

14. TINGTING

15. TANGIANG PANGONDIANON

P : Di bagasan roha mauliate ala ni haheheonMi ale Kristus, ro do hamि marsomba tu joloM, huhut mamboan saluhut sihol ni rohanami

Ale Debata, sai mian ma nian habisuhon dohot hatigoranMi di roha ni angka pamarentanami di Indonesia on;

U : *asa saluhut halak manjalo hadameon laho mandalani parngoluanna huhut mamuji Ho.*

P : Ale Debata, sai manongtong ma nian pangurupionMu di tongatonga ni bangso on;

U : *asa saluhut hamि dohot angka panggomgominami rap patupahon: ngolu na marhatigoran, hasadaon ni roha, niuluhon ni habisuhon na sian Ho i, tu sude pangisini bangso on.*

P : Ale Debata, sai mian ma nian roha na masiantusan di hamि sama hamि di tongatonga ni keberagamannami;

U : *asa saluhut ruasMu mangolu di bagasan parsaoran na denggan, masiurupan, jala marhadameon.*

P : Ale Debata, sai manongtong ma panghirimon di rohanami di na manguduti ngolunami hamि di portibi on;

U : *asa unang mandele hamि jumpa ro angka parungkilon tu hamि;*

*asa unang magopu rohanami jumpa ro angka sitaonon
tu ham;*
*asa tongtong marsada hami jumpa ro parsalisian tu
ham;*
*asa unang madabu hami jumpa ro pangunjungan tu
hami.*

P : Ale Debata, paimbaru ma hami alani haheheonMi, asa tarpatupa hami mangihuthonHo huhut manghangoluhonHo di ngolunami nuaeng nang sogot pe, rap dohot sude angka na tinompaMi.

U : *Ale Debata, sai tangihon ma joujou pangidoannami
jala pasupasu ma hami marhite huasoMi, amen.*

16. KOOR

17. ENDE: "HALELUYA TAENDEHON" BE.95:1... (BL.222) (PELEAN 1A & 1B)

*Haleluya taendehon, nuaeng di ari haheheon Tuhanta Siparmonang i/
Ai malua do Ibana, haruar sian tanomanNa, na talu hamatean i/ Sun
ulaonNa i dibaen Tuhanta i Haleluya/ naung sahat di Tuhanta i upaNa
na sumurung i.*

*Tongam di parungkilonNa dipangke Jesus i gogoNa mangalo
sipangago i/ Hita naung pinarhatoban ni setan dapot haluaon
dibaen hamonanganNa i/ Naung sae utangta i digarar Jesus i
Haleluya/ Di Tuhan i rohanta i saleleng ni lelengna i*

*Na so pola habiaran ni hita on be hamatean, ai hita pe sai hehe do/
Molo burju taihuthon Tuhanta i di parungkilon sai ingkon tu
lambungNa ro/ Diboan Jesus i do hita on muse tu lambungNa/
Parmonang i, sai saut ma i binaen ni hagogoonMi*

*Ale ari haheheon, boha ulaning hilalaon ni rohangkon di tingkimi/
Ndang hapalang las ni roha di hasosohot ni na roa ro di sude na
hansit i/ O Jesus togu ma bangsoM tu Debata, tu na sonang/
O Rajangki, naung hehe i, pasahat au tu lambungMi*

18. JAMITA : MATEUS 28:1-10

19. ENDE: "HALELUYA, HALELUYA" BE.624:1...

(PELEAN TU KATEGORIAL PAROMPUAN)

*Reff.Haleluya, Haleluya nunga hehe Tuhanta i/ Haleluya, haleluya
puji goarNa i*

- Jesus sigomgom tano on, Tuhan ni sandok portibi on/ *Reff.*
- Boan barita na Ulli tu saluhut na tinompa i/ *Reff.*
- Mate au raphon Kristus i, hehe muse raphon Tuhan i/ *Reff.*
- Ngolu na sora suda i, upa ni angka na monangi/*Reff.*
- Pasangap Debatanta I, endehon ma Sipalua i/ *Reff.*

20. TANGIANG PELEAN-ALE AMANAMI-PARSURUON-PASUPASU (JONGJONG)

P : Tatangianghon ma peleanta: Ale Debata, Amanami na di banua ginjang, Ho do haroroan ni saluhut silehonlehon na dengan dohot nasa ulibasa na mauliutus. Hupasahat hamि ma sian na nilehonMi tu hamि, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hamि pelean on, patimbulhon harajaonMu di tongatonga ni HuriaM dohot di portibi on. Buhai ma rohanami marhitehite TondiM, asa lam hutanda hamि godang ni silehonlehonMi tu hamि, asa lam girgir hamि mandak mauliate tu Ho, marhitehite Jesus Kristus Tuhanhami. A m e n .

U: (*Mangendehon*)

Ai Ho do nampuna harajaon, dohot hagogoon, ro di hasangapon, salelengnile lengna. Amen...

P : Ale Tuhan Debata, Amanami jala Parasiroha ! Mauliate ma rohanami jala pujionnami Ho, ala naung ditubuhon Ho hamि paduahalihon sian godang ni asi ni rohaM tu pangkirimon na mangolu marhitehite haheheon ni Tuhan Jesus Kristus sian na mate. Nunga gabe Sipalua jala Sipangolu AnakMi di hamि, jala Ibana Tuhanhami, Ibana Ulunami, siihuthononnami. Na marlas ni roha do hamि nuaeng marningot haheheonNa i.

Nunga talu sibolis, talu hamatean, talu banua toru. Ndang mabiar be hamि mida hamatean dohot soropna, ai nunga monang Tuhanami. Ulubalang na gogo i. Ibana do manogihon hamि sian hamatean tu haheheon sogot. Ala ni i umbahen hupangido hamи: Sai asi ma rohaM, patogu ma haporseaonnamи maniop Barita na Uli i, asa unang ganggu rohanami di na hubolus hamи hamatean i. Sai sungguli ma rohanami dohot roha ni dongannamи, asa rap hehe hamи sian parrohaon na buruk i; asa tarulahan hamи parange na imbaru. Sai pasupasu ma HuriaM dohot Parbarita na Uli, na mamaritahon haheheon ni Tuhanami, asa lam tarsunggul angka na pedem roha jala hehe sian dosana be. Sai papos ma rohanami manghaporseai, naung mardame jala mardomu hamи tu Ho ala ni pardenggan na pinatupa ni AnakMu. Sai pasabam jala pamalum ma rohanami. Tompa ma roha na ias dohot tondi na marsihohot di bagasan hamи, asa tarhajongJongkon hamи, naung pintor hamи ala ni hatigoran na pinatupa ni Tuhan Jesus Kristus. Sai sungguli ma pangkirimon na mangolu di hamи, asa tarapul rohanami marningot angka dongannamи naung jumolo nialapMi, jala asa tarapul rohanami manaon sitaonon di hasiangan on. Sai apuli ma angka na matean, na dangol, na pogos, na so marina, angka na mabalu dohot angka na malungun tu banua ginjang marhitehite haheheon ni Tuhan Jesus Kristus, Tuhanami.

Amen.

Ale Amanami na di banua ginjang ! Sai pinarbadia ma GoarMu ! Sai ro ma harajaonMu ! Sai saut ma lomo ni rohaM di banua tonga on songon na di banua ginjang ! Lehon ma tu hamи sadari on hangoluan siapari ! Sesa ma dosanami songon panesanami di dosa ni dongan na mardosa tu hamи ! Unang hamи togihon tu pangunjungan ! Palua ma hamи sian pangago !

U: (*Mengendehon*)

Ai Ho do nampuna harajaon dohot hagogo on ro di hasangapon saleleng ni lelengna. A m e n !

P : Nunga hehe Jesus!

U: Alani, hehe do hamि manadinghon saluhut angka biar ni rohanami, asa marhiras ni roha hamि di bagasan Ibana, Mual ni Hangoluan si salelengnile lengna i.

P : Nunga monang Ibana!

U: HamonanganNa i do na manogihon hamि manghatindanghon Ibana tu sandok portibi on. HamonanganNa i do na gabe hamonangan ni saluhut angka na porsea, hamonangan ni hatigoran dohot hasintongan, hamonangan ni saluhut ulaon laho patingkoshon uhum tu angka na metmet jala na dangol; jala loas ma hamि gabe parsidohot di saluhutna i.

P : Nunga marpadan be hamu dohot Debata, alani laho ma hamu, ulahon hamu ma i, jala jalo hamu ma pasupasu sian Debata “Dipasupasu jala diramoti Tuhan Debata ma ho. Disondangkon Tuhan Debata ma bohiNa tu ho jala asi ma rohaNa mida ho. Didompakhon Tuhan Debata ma bohiNa tu ho jala dipasaorhon ma dameNa tu tondim”.

U: (*Mangendehon*)

Amin... Amin... Amin...